

কথা বলার কৌশল

ত্রিভাষা

সূচিপত্র

কথা তো বলতেই হয়	৭
১০১টি কথা	১১
নীরবতার বরফ ভাঙা	২৭
সামাজিক কথা	৪৩
বাক্পটুদের সাধারণ বৈশিষ্ট্য	৬০
হাল ফ্যাশনের বাগরীতি অনুসরণ	৭০
ব্যবসায়িক কথা	৭৯
ভালো আর খারাপ অতিথি	১০৫
ভুল থেকে বাঁচার উপায়	১১৩
বক্তৃতা দেওয়ার উপায়	১২৩
বক্তৃতা দেওয়ার আরও কিছু টিপস	১৩৭
রেডিও-টিভিতে কথা বলার উপায়	১৫৩
ভবিষ্যতের কথা	১৬৯

কথা তো বলতেই হয়

একটা প্রশ্ন দিয়ে শুরু করি। চিন্তা করে দেখুন তো, নিচের দুটো থেকে যেকোনো একটা বেছে নিতে হলে আপনি কোনটা নেবেন :

১. বিমান থেকে লাফ দিতে হবে, কিন্তু সঙ্গে কোনো প্যারাসুট পাবেন না।
২. ডিনার পার্টিতে আপনার সামনে এমন কাউকে বসিয়ে দেওয়া হলো, যাকে আগে কখনো দেখেননি।

যদি প্রথমটা বেছে নেওয়ার ইচ্ছে হয়, তাহলে মন খারাপের কিছু নেই। কারণ, আপনার মতো অনেকেই একবারের জন্য হলেও এক নম্বরটি বেছে নেওয়ার কথা ভাববেন; বিমান থেকে লাফ দেবেন কোনো প্যারাসুট ছাড়াই।

‘কথা’ এমন এক জিনিস, যেটা আমাদের প্রতিদিনই বলতে হয়। কিন্তু পরিস্থিতি অনুসারে এই কথা বলা কখনো আমাদের কাছে মনে হয় খুব কঠিন, আবার কখনো-বা মনে হয় এর চেয়ে মজার জিনিস আর হতেই পারে না। জীবনে সাফল্য পেতে চাইলে, সেটা সামাজিক অথবা পেশাগত যা-ই হোক না কেন—কথা আপনাকে বলতেই হবে। তবে এক্ষেত্রে আত্মবিশ্বাসের অভাব থাকলে সাফল্যের পথ কিন্তু হয়ে যাবে কঠিন।

মানুষের সঙ্গে কথা বলার খুঁটিনাটি সবকিছু সহজে আপনাদের কাছে তুলে ধরার জন্য আমার এই লেখা। গত সাঁইত্রিশ বছর ধরে কথা বলা আমার পেশা। এই দীর্ঘ সময়ে আমাকে রেডিও আর টিভিতে কাজ করতে হয়েছে, কথা বলতে হয়েছে মাইকেল গর্বাচেভ থেকে শুরু করে মাইকেল জরডানের সঙ্গে। বিভিন্ন শ্রেণি ও পেশার মানুষের সঙ্গে কথা বলেছি আমি। তাদের মধ্যে

রথী-মহারথী যেমন আছেন, তেমনি আছেন খুব সাধারণ মানুষ। শেরিফ থেকে শুরু করে সাধারণ বিক্রয়কর্মী—সব ধরনের মানুষের সঙ্গে কথা বলতে হয়েছে আমায়। ভুলেও ভাববেন না কাজটা খুব সহজে করতে পেরেছি। নানা রকম অস্বস্তি ঘিরে ধরেছে আমাকেও। কিন্তু ধীরে ধীরে সেগুলো কাটিয়ে উঠেছি। কীভাবে সুন্দর করে কথা বলতে হয় সে ব্যাপারে সব সময় শিখতে হয়েছে। এই বইতে আপনাদের সেই শেখার কথা জানাব। আপনি কথা বলুন একজনের সঙ্গে কিংবা একশজনের সঙ্গে, নির্দিষ্ট কিছু নিয়ম আপনাকে মানতেই হবে।

আমার কাছে কথা বলা হচ্ছে অপার এক আনন্দের বিষয়। এই কাজ করে সব সময় মজা পাই। ব্রুকলিন শহরের ছিয়াশি নম্বর স্ট্রিটে বড় হয়েছি আমি। বাসা থেকে বের হয়ে বন্ধুকে নিয়ে প্রায়ই বে পার্কওয়েতে ছুটে যেতাম। বন্ধুর সঙ্গে কথা বলতে বলতে একসময় ফুরিয়ে যেত সব বিষয়। কিন্তু চুপ করে থাকতে পারতাম না; শেষ পর্যন্ত আর কোনো বিষয় না পেয়ে রাস্তায় ঘুরতে থাকা গাড়িগুলোর বর্ণনা দিতাম। তখন আমার বয়স মাত্র সাত বছর। বন্ধুটি একসময় আমার নাম দিয়ে দেয়—‘দ্য মাউথপিস’।

সে সময় আমার সবচেয়ে ভালো বন্ধু ছিলেন হার্ব কোহেন। সে এখনও আমার খুব প্রিয় বন্ধু। যাহোক, একবার ইবিটস ফিল্ডে খেলার আয়োজন করা হলো। খেলাটা সম্প্রচার করার দায়িত্ব দেওয়া হলো আমাকে। কাজটা শেষ করে আমি বাসায় ফিরে এলাম। তারপর বন্ধু হার্ব কোহেনকে ডেকে বললাম কী কী ঘটেছে খেলার মাঠে; বিন্দু-বিসর্গ কিছুই বাদ দিলাম না—গড়গড় করে সব বলে গেলাম। আমার প্রসঙ্গে কোনো কথা উঠলেই হার্ব মানুষজনকে বলে বেড়ায়—‘একবার ইবিটস ফিল্ডের একটা খেলায় ল্যারিকে পাঠানো হয়। দুই ঘণ্টা দশ মিনিট ধরে চলে সে খেলা। ম্যাচের পুরোটা সময়জুড়ে কথা বলে গেছে ল্যারি। সমস্ত খুঁটিনাটি ব্যাপার সে বর্ণনা করেছে।’

পরীক্ষার মনে আছে, দশ বছর বয়সে হার্বের সঙ্গে প্রথম দেখা হয় আমার। স্কুলে ক্লাস করার সময় হঠাৎ প্রিন্সিপালের রুমে ডাক পড়ে। সেখানে পৌঁছে দেখি আমারই বয়সী আরেকটা ছেলে দাঁড়িয়ে আছে। তখন থেকেই ওর সঙ্গে আমার পরিচয়। এখন আমরা দুজনের কেউই মনে করতে পারি না কেন আমাদের প্রিন্সিপালের রুমে যেতে বলা হয়েছিল। তবে একটা ব্যাপার আমাদের ঠিকই মনে আছে, ক্লাসে কথা বলার ক্ষেত্রে বাকি সবাইকে ছাড়িয়ে যেতাম আমরা!

কথা বলে মজা পাই আমি। কাজেই এটাও জানি মানুষ কেন মাঝেমাঝে কথা বলতে অস্বস্তিবোধ করে। এর মূল কারণ হচ্ছে ভয়। ভুল কিছু বলে ফেলার ভয় কিংবা ঠিক কিছুই বলছেন, কিন্তু বলার ধরনটা ঠিক হচ্ছে না—এই দুটো ভয়ই তাদের অস্বস্তির মূল কারণ। একজন লেখক বলেছেন—‘এ রকম হলে সবচেয়ে বুদ্ধিমানের কাজ হলো চুপ করে থাকা, তা সে লোকে যতই ভাবুক যে আপনি একটা বোকা কিসিমের লোক। এসব ক্ষেত্রে আপনাকে চুপ থাকতে হবে। চুপ থাকতে হবে ততক্ষণ পর্যন্ত, যতক্ষণ না আপনি নিজের মন থেকে সব সন্দেহ দূর করতে পারছেন।’ একজন আগন্তুক কিংবা একসঙ্গে অনেক লোকের সঙ্গে কথা বলার সময় আপনার এই ভয় কিন্তু দ্বিগুণ হয়ে যাবে। আশা করি বইটি আপনাদের এই ভয় দূর করতে সাহায্য করবে।

প্রথমেই একটা কথা জানিয়ে রাখি—অঙ্গভঙ্গি ঠিক থাকলে আপনি যেকোনো মানুষের সঙ্গে ঠিকভাবে কথা বলতে পারবেন। কীভাবে নিজের কথাকে সবার কাছে গুরুত্বপূর্ণ করে তুলতে হবে, এই বই পড়ে সে ব্যাপারে অনেক কিছু শিখতে পারবেন। কাজেই অনেক সহজে আর চাপমুক্ত হয়ে কথা বলতে পারবেন আপনি। কথা বলাটা তখন আপনার কাছে মনে হবে মজার কোনো খেলা। চাপের বদলে পুরো ব্যাপারটা তখন উপভোগ করবেন।

কথা বলার খুঁটিনাটি প্রায় সব বিষয় নিয়ে আলোচনা করা হয়েছে এ বইতে। কাজিনের বিয়ের অনুষ্ঠান থেকে শুরু করে ডিনার পার্টি কিংবা প্যারেন্ট, টিচার অ্যাসোসিয়েশনের সভা—কোথায় কীভাবে কথা বলতে হবে, সে ব্যাপারে জানতে পারবেন। রেডিওতে একজন অতিথির সঙ্গে কথা বলার সময়ও অনেক নতুন কিছু শিখতে হয়েছে আমাকে। সেসব জিনিসও আপনাদের জানাব।

মানুষের সঙ্গে যোগাযোগের সবচেয়ে সহজ আর গুরুত্বপূর্ণ মাধ্যম হচ্ছে কথা বলা। এই বৈশিষ্ট্যের জন্যই আমরা অন্যান্য জীব থেকে সম্পূর্ণ আলাদা। হিসাব করে দেখা গেছে, একটা মানুষ প্রতিদিন গড়ে ৮০ হাজার শব্দ উচ্চারণ করেন। হিসাবটা আমার কাছে একটুও অতিরঞ্জিত বলে মনে হয় না। তবে আমার ক্ষেত্রে এই হিসাব খাটবে না। আমি একটু বেশিই কথা বলে থাকি। বাকপটু হওয়ার জন্য যেসব যোগ্যতার প্রয়োজন, সেগুলো জানার একটা সুযোগ যখন পাওয়া গেছে, তখন আর দেরি করা কেন? এখনই শুরু করে দিন। চলে যান পরের পৃষ্ঠায়, চালিয়ে যান কথার গাড়ি!

১০১টি কথা

সফল আলোচনার কিছু সাধারণ নিয়ম

- সততা
- সঠিক ভঙ্গি
- অন্যের প্রতি কৌতূহল
- নিজের মধ্যে কোনো দ্বিধা না রাখা

কথা হচ্ছে অনেকটা গলফ খেলা, গাড়ি চালানো কিংবা একটা দোকানের মালিক হওয়ার মতো—একবার ঠিকভাবে শুরু করার পর আর থামতেই ইচ্ছে করবে না। অনবরত চালিয়ে যেতে পারবেন কথার গাড়ি। কিন্তু এর জন্য সবার আগে সাধারণ কিছু নিয়মের ব্যাপারে জানতে হবে।

নিজেকে আমার ভাগ্যবান বলে মনে হয়। কারণ, কথা বলার ক্ষেত্রে একটা পর্যায় পর্যন্ত আসতে পেরেছি আমি। আমার এই বই পড়তে পড়তে আপনি ভাবতে পারেন, কথা বলাটা ল্যারির কাছে তো মজাই মনে হবে। কারণ, সে খুব ভালোভাবে করতে পারে কাজটা। এটা সত্যি যে, কথা বলার জন্য নিজের ওপর কোনো জোর খাটাতে হয় না আমায়। বিনা চেষ্টায় একের পর এক কথা বলে যাই। আপনাদের মধ্যে যাদের এই স্বাভাবিক ক্ষমতা আছে, তারাও কিন্তু এই বই পড়ে দেখতে পারেন। কারণ, এই বই পড়ার পর আপনার এই স্বাভাবিক ক্ষমতা অনেকটাই বেড়ে যাবে।

ধরা যাক, কথা বলায় আপনি এক উজ্জ্বল প্রতিভা। কিন্তু আপনার এই প্রতিভার সঙ্গে দক্ষতা যোগ করার প্রয়োজন আছে। উদাহরণ হিসেবে টেড

উইলিয়ামের কথা বলা যায়। আমার দেখা শ্রেষ্ঠ বেসবল হিটার সে। বেসবল খেলায় তার মতো যোগ্য কাউকে আমার চোখে পড়েনি। তাই বলে সে কিন্তু নিজের প্র্যাকটিস বন্ধ রাখেনি। আর সব বেসবল হিটারের মতো সেও প্রতিদিন তার ব্যাটিং প্র্যাকটিস চালিয়ে গেছে। অদ্ভুত সুন্দর গলা ছিল লুসিয়ানো প্যাভরোটির। তারপরও প্রতিদিন তিনি সংগীতচর্চা করতেন।

আগেই বলেছি, কথা বলার স্বাভাবিক, স্বতঃস্ফূর্ত একটা ক্ষমতা আছে আমার। কিন্তু তারপরও মাঝেমধ্যে এমন অনেক সময় এসেছে, যখন কথা বলাটা মনে হয়েছে বিশাল কোনো পাহাড় উপকানো!

আমার প্রথম অশুভ আত্মপ্রকাশ

চলুন, আজ থেকে সাঁইত্রিশ বছর আগে মায়ামি বিচের রেডিও স্টেশনে ফিরে যাই। জীবনে প্রথম রেডিওর সামনে কথা বলার জন্য তৈরি হয়েছি আমি। বিশ্বাস করুন, আপনি যদি সেই সময় আমার সঙ্গে থাকতেন, তাহলে নিঃসন্দেহে মনে করতেন—হাল ছেড়ে দিয়ে যেকোনো মুহূর্তে স্টেশন থেকে বেরিয়ে যাব। কিন্তু আমি হাল ছাড়িনি। তাহলে শুনুন সেই ঘটনা।

ওয়াশিংটনের ফার্স্ট স্ট্রিটে যে পুলিশ স্টেশন আছে, তার ঠিক পাশেই ডব্লিউএএইচআর নামে ছোট্ট এক স্টেশনে প্রথম চাকরি হয় আমার। ১৯৫৭ সালের মে মাসে চাকরিতে যোগ দিই। তবে এই চাকরি পেতে আমাকে কি পরিমাণ কাঁঠখড় পোড়াতে হয়েছে, সে ব্যাপারে আপনাদের না জানালেই নয়।

তিন সপ্তাহ ধরে স্টেশনে আসা-যাওয়া; ভেতরে গিয়ে শুধু এদিকে-সেদিক ঘোরাঘুরি করি। একটা চাকরি পাওয়ার স্বপ্নে তখন বিভোর হয়ে আছি। স্টেশনের ম্যানেজার সিমন্ডস খেয়াল করলেন ব্যাপারটা। হঠাৎ একদিন ডেকে বললেন, আমার কণ্ঠটা বেশ ভালো লাগে তার। কিন্তু চাকরির

পোস্ট খালি না থাকায় এই মুহূর্তে কোনো চাকরি দিতে পারছেন না। তার কথা শুনে মোটেও হতাশ হইনি আমি। জানতাম, একসময় না একসময় একটা সুযোগ আসবেই। তাকে বললাম, আমি অপেক্ষা করতে রাজি আছি। তিনি বললেন খুব ভালো। অপেক্ষা করতে পারলে একটা না একটা খালি পোস্ট পেয়ে যাব।

ব্রুকলিন শহরের এই স্টেশনটা পছন্দ করার পেছনে একটা কারণ আছে। আমার চাচা জ্যাক তার স্ত্রীকে নিয়ে এই শহরেই ছোট্ট এক ফ্ল্যাটে থাকতেন। আমার সৌভাগ্যই বলতে হবে, ফ্ল্যাট থেকে পায়ে হেঁটেই স্টেশনে পৌঁছাতে পারতাম। এভাবে দিনের পর দিন অপেক্ষা করতে লাগলাম আমি। বললে হয়তো বিশ্বাস করবেন না, তখন আমার পকেটে কোনো টাকা ছিল না। মাথার ওপর চাচার ওই ছোট্ট ফ্ল্যাটের ছাদই একমাত্র সম্বল। খালি পকেটে প্রতিদিন স্টেশনে চলে যেতাম। দেখতাম ডিস্ক জকিরা কীভাবে কাজ করছেন, কীভাবে সংবাদ পাঠক বা পাঠিকারা সংবাদ পাঠ করছেন, বাদ দিতাম না খেলার সংবাদ পাঠকদের কাজও। সবই দেখতাম গভীর মনোযোগ দিয়ে।

এপি আর ইউপিআই থেকে আসা সংবাদগুলো কীভাবে পরিবেশন করা হচ্ছে, সেটা মন্তুমুখের মতো দেখতাম আমি। তারপর হঠাৎ একদিন খেয়াল করলাম, বেশ কয়েকদিন ধরে অফিসের একজন কর্মকর্তা আসছেন না। তিনি যে চাকরি করছেন না, সেটা বুঝতে পারলেও কাউকে কিছু বললাম না। আগের মতোই মনোযোগ দিয়ে দেখতে লাগলাম সবকিছু।

তারপর হঠাৎ এক শুক্রবার ম্যানেজার সিমন্ডস তার কামরায় আমাকে ডেকে পাঠালেন। জানালেন আমার জন্য একটা চাকরির ব্যবস্থা হয়েছে। সোমবার সকাল ৯টা থেকে কাজে যোগ দিতে হবে। প্রতি সপ্তাহে ৫৫ ডলার করে পাব। সোমবার থেকে শুক্রবার—এই পাঁচ দিন কাজ করতে হবে। প্রতিদিন সকাল থেকে দুপুর পর্যন্ত রেকর্ড করা বিভিন্ন ধরনের গান বাজাতে

হবে আর কথা বলতে হবে। তারপর শুরু হবে খেলা আর সাধারণ সংবাদ পাঠ। এটা চলবে দুপুর থেকে বিকাল ষ্টো পর্যন্ত।

এভাবেই সত্যি হলো আমার স্বপ্ন। সবচেয়ে বড় কথা, সকালে রেডিও জকি হিসেবে টানা তিন ঘণ্টা কাজ করার পরও আমি ছুটি পাচ্ছি না। তারপর আবার বিভিন্ন ধরনের খবরও পাঠ করতে হবে আমায়। উত্তেজনায় পুরো সপ্তাহ ঘুমাতে পারলাম না। কীভাবে রেডিওর সামনে কথা বলব, সে ব্যাপারে পুরো সাত দিন প্র্যাকটিস করলাম। দেখতে দেখতে বহুল আকাঙ্ক্ষিত সেই দিনটা চলে এলো। আজকেই প্রথম চাকরি করতে যাব ভেবে অদ্ভুত উত্তেজনাময় এক অনুভূতি হলো আমার।

সকাল সাড়ে ৮টায় হাতে ছোট্ট একটা বুড়ি নিয়ে স্টেশনের দিকে রওনা হলাম। স্টেশনের ভেতরে যাওয়ার পর ক্ষণে ক্ষণে আমার গলা আর মুখের ভেতরটা শুকিয়ে কাঠ হয়ে যাচ্ছিল। এ রকম যে হবে সেটা আমি আন্দাজ করতে পেরেছিলাম। কাজেই বুড়িতে করে কফি আর পানি নিয়ে গিয়েছিলাম। কিছুক্ষণের মধ্যে স্টেশনে পৌঁছে গেলাম। মিনিট পাঁচেক পর পরই বুড়ি থেকে কফি আর পানি বের করে পান করতাম। একটা থিম সং রেকর্ড করে রাখা হয়েছে আগেই। সবার আগে সেটাই বাজিয়ে শোনাতে হবে শ্রোতাদের। গানটার কথা এখনও পরিস্কার মনে আছে আমার। ওটা ছিল লেস এ্যালগার্ট-এর গাওয়া ‘সুইং ডাউন দ্য লেন’।

স্টেশনের ভেতরে স্টুডিওতে বসে আছি। সবকিছু তৈরি। নির্দিষ্ট সময়েই শুরু হবে আমার প্রথম কাজ। প্রতি মুহূর্তে যেন লাগাম ছাড়া দড়ির মতো আমার নার্ভাসনেস বেড়ে যাচ্ছিল। এ সময় ম্যানেজার মার্শাল সিমন্ডস হঠাৎ তার কামরায় ডেকে পাঠালেন। অফিসে ঢুকতেই আমাকে গুড লাক জানালেন। তারপর বললেন—‘আপনি কি নাম ব্যবহার করবেন?’

‘আপনার কথা ঠিক বুঝলাম না’, বললাম আমি।

‘ল্যারি জিগির নামটা ব্যবহার করা উচিত হবে না আপনার। শ্রোতারা এই নাম সহজে মনে রাখতে পারবে না। এমনকি নামটা বানান করতেও সমস্যা হতে পারে তাদের। ভালো আর সহজ একটা নাম দরকার। ল্যারি জিগিরটা আপাতত বাদ দিতে হবে।’

ডেস্কে তাকিয়ে দেখলাম সেখানে মায়ামি হেরাল্ড নামে একটা ম্যাগাজিন পড়ে আছে, খোলা। পুরো পাতাজুড়ে একটা বিজ্ঞাপন ছাপা হয়েছে। কি মনে হতেই মাথা নিচু করে পত্রিকাটির দিকে তাকালেন সিমন্ডস, তারপর হঠাৎ বলে বসলেন—‘ল্যারি কিং হলে কেমন হয়?’

‘ঠিক আছে’, বললাম আমি।

‘আজ থেকে আপনার নাম হচ্ছে ল্যারি কিং। আপনি হচ্ছেন দ্য ল্যারি কিং শো’র হোস্ট।’

নতুন চাকরি, নতুন নাম, নতুন শো, নতুন থিম সং—সবকিছুই ঠিক আছে। ঘড়ির কাঁটা ৯টা ছুঁলো বলে। স্টুডিওর ভেতর বসে আছি। নতুন থিম সং ‘সুইং ডাউন দ্য লেন’ আগেই তৈরি করে রেখেছি। দ্য ল্যারি কিং শো শুরু হতে যাচ্ছে। সব আয়োজন ঠিক থাকলেও আমার অবস্থা তখন ‘ছেড়ে দে মা কেঁদে বাঁচি’র মতো। গলার ভেতরটা যেন শুকনো খটখটে মরুভূমি।

যাহোক, ৯টা বেজে গেছে। প্রথমেই থিম সংটা চালিয়ে দিলাম। গান বাজছে, কিছুক্ষণ পর কথা বলার জন্য ভলিউম কমিয়ে দিলাম। কিন্তু আশ্চর্যের ব্যাপার, আমার মুখ থেকে একটা শব্দও বের হচ্ছে না। সেকেন্ডের পর সেকেন্ড চলে যাচ্ছে। কিন্তু একটা কথাও বলতে পারছি না আমি। যেন জমে পাথর হয়ে গেছি। পরে বাধ্য হয়ে ভলিউম বাড়িয়ে দিলাম।

কিছুক্ষণ পর বুকে সাহস সঞ্চয় করে আবার কমিয়ে দিলাম ভলিউম। কিন্তু কিছুতেই কিছু হচ্ছে না। আমি কথা বলতে পারছি না। এদিকে রেডিওর শ্রোতারা শুধু একটা রেকর্ড করা গান শুনতে পাচ্ছেন। এরই মধ্যে তারা নিশ্চয়ই ভাবতে শুরু করেছেন কেউ কোনো কথা বলছে না কেন। সেই সঙ্গে বাড়তি ঝামেলা হচ্ছে একটু পর পর গানের আওয়াজ বাড়ি আর কমা।

এখনও পরিষ্কার মনে আছে, ওই সময় আমি শুধু একটা কথাই ভাবছিলাম—ভুল কিছু বলে ফেলব না তো। শেষ পর্যন্ত কাজে ইস্তফা দেওয়ার চিন্তাও করেছিলাম। মাথার ভেতর চিন্তা ঢুকল রেডিওর এই কাজ ভালোবাসি আমি। তারপরও কেন আমি কথা বলতে পারছি না। নিজের প্রশ্নের উত্তর নিজেই দিলাম। বুঝতে পারলাম, আসলে এই কাজের জন্য এখনও নিজেকে প্রস্তুত করতে পারিনি আমি। স্টুডিওতে বসে বসেই ভাবতে লাগলাম এই কাজ করার কোনো যোগ্যতা নেই আমার। কিছুক্ষণ পর মার্শাল সিম দরজা ধাক্কা দিয়ে স্টুডিওর ভেতরে ঢুকে পড়লেন। মাত্র চারটা শব্দ বললেন তিনি—‘এটা যোগাযোগের একটা মাধ্যম।’ কথাগুলো বলেই কন্ট্রোল রুম থেকে বেরিয়ে গেলেন।

তিনি চলে যাওয়ার পর আমি মাইক্রোফোনের দিকে ঝাঁকলাম, তারপর জীবনে প্রথম কথা বললাম রেডিওতে :

‘শুভ সকাল। জীবনে এই প্রথম রেডিওতে কথা বলছি আমি। এ রকম একটা চাকরি পাওয়ার শখ আমার অনেক দিনের। আজকের দিনটার জন্য সপ্তাহজুড়ে প্র্যাকটিস করেছি। এখন থেকে ঠিক পনেরো মিনিট আগে নতুন একটা নাম দেওয়া হয়েছে আমায়। আপনাদের জন্য একটা থিম সং রেডি করে রেখেছি। কিন্তু মুখের ভেতরটা শুকিয়ে কাঠ হয়ে গেছে আমার। আমি নার্ভাস। কিছুক্ষণ আগে স্টেশনের জেনারেল ম্যানেজার কন্ট্রোল রুমের দরজা খুলে ভেতরে ঢুকলেন। বললেন—“এটা যোগাযোগের একটা মাধ্যম”।’

শেষ পর্যন্ত কিছু একটা বলতে পারলাম আমি। এটাই আমাকে সাহস জোগাল। এরপর গড়গড় অনেক কথা বলতে পারলাম। পুরো শো-তে এক মুহূর্তের জন্য কোনো অস্বস্তি হয়নি আমার। এভাবেই শুরু হয় আমার কথা বলার পেশা। এরপর রেডিওর সামনে আর কোনোদিন নার্ভাস হইনি।

দর্শক-শ্রোতাদের সঙ্গে সততা

প্রথম দিন যা অভিজ্ঞতা হলো, তাতে একটা জিনিস শিখতে পেরেছি আমি। আপনি রেডিওতে কথা বলুন অথবা অন্য কোথাও, সৎ থাকলে কখনো কোনো ভুল হবে না আপনার। আর্থার গুডফ্রে একবার আমাকে বলেছিলেন—‘দর্শক-শ্রোতাদের কাছে তোমার অভিজ্ঞতা আর অনুভূতি লুকাবার চেষ্টা করো না।’

রেডিওর মতো মায়ামির টিভি টক শো-তেও একই অভিজ্ঞতা হয়েছিল আমার। তবে প্রথম দিনই সেটা কাটিয়ে উঠেছিলাম। টিভি শো’র প্রথম দিনেই আমার মাথায় একটা চিন্তা ঢুকে গিয়েছিল—আমি তো আগে কখনো টিভির সামনে কথা বলিনি। ব্যাপারটা নিয়ে ভাবতে ভাবতে নিজের অজান্তেই নার্ভাস হয়ে পড়ি। তার ওপর আবার পরিচালক মারাত্মক এক ভুল করে বসেন। একটা সুইভাল চেয়ারে আমাকে বসতে দেন তিনি। নার্ভাস হওয়ায় চেয়ারটা একবার সামনে আরেকবার পেছনে ঠেলছিলাম। টিভির সব দর্শক দেখছিল সেটা।

আবার আগের মতো নিজের সব কথা জানাবার সিদ্ধান্ত নিলাম আমি। দর্শকদের বসলাম আমার নিজের জায়গায়। সরাসরি তাদেরকে বললাম, আমার খুব নার্ভাস লাগছে। গত তিন বছর আমি রেডিওতে চাকরি করেছি। কিন্তু টিভি শো আজকেই প্রথম। আর কেউ একজন ভুল করে আমাকে এই সুইভাল চেয়ারে বসতে দিয়েছেন। এতক্ষণ আমি কি অবস্থায় ছিলাম সেটা আর কারো অজানা নেই। বললে বিশ্বাস করবেন না, কথাগুলো বলার সঙ্গে

সঙ্গে রেডিওর মতো এবারও আবার সব নার্ভাসনেস উধাও হয়ে গেল। এরপর স্বাভাবিকভাবে গড়গড় করে কথা বলে গেলাম। পুরো ব্যাপারটা আসলে সম্ভব হয়েছে দর্শকদের কাছে সৎ থাকার কারণে।

কিছুদিন আগে এক ব্যক্তি আমাকে প্রশ্ন করেছিল—‘ধরুন, মানুষভর্তি একটা হলের ভেতর দিয়ে হেঁটে যাচ্ছেন আপনি। এ সময় কেউ একজন আপনাকে ধরে স্টুডিওর ভেতরে একটা চেয়ারে বসিয়ে দিলো। তারপর আপনার হাতে কিছু কাগজ ধরিয়ে দিয়ে বলল—“এটা পড়ুন”। এরপর জ্বলে উঠল আলো। তখন কি করবেন আপনি?’

উত্তরে বললাম, এক্ষেত্রে সম্পূর্ণ সৎ থাকব আমি। ক্যামেরার দিকে তাকিয়ে বলব—‘এই হল দিয়ে হাঁটছিলাম আমি। এ সময় এক লোক আমায় স্টুডিওর ভেতরে নিয়ে এলো। তারপর হাতে কিছু কাগজ ধরিয়ে দিয়ে বলল, শ্রোতাদের এটা পড়ে শোনান।’

এ কথা বলার সঙ্গে সঙ্গে শ্রোতারা কয়েকটা জিনিস জেনে যাবে আমার সম্পর্কে—আমি আগে কখনো সংবাদ পাঠ করিনি, কোনটার পর কোনটা আসবে সে ব্যাপারে আমার কোনো ধারণা নেই, বাধ্য হয়ে এমন কিছু একটা আমাকে করতে হচ্ছে, যেটা আমার নিজের কাছেই খুব অদ্ভুত লাগছে, আমি জানি না সামনে এতগুলো ক্যামেরার মধ্যে ঠিক কোনটার দিকে আমাকে তাকাতে হবে।

সত্যি কথা বলতে কি, এই ভয়গুলোই কাজ করছিল আমার মধ্যে। কিন্তু শ্রোতাদের সব খুলে বলার পর তাদের আর আমার অবস্থা কিন্তু এক হয়ে গেল। শ্রোতা আর আমি দুই পক্ষই এখন এক। নিজের অনুভূতির কথা অকপটে স্বীকার করায় আমার অবস্থা সম্পর্কে একটা ধারণা পেয়েছে তারা। বুঝতে পারছে, এখন আমি তাদের নিজের সবটুকু দেওয়ার চেষ্টা করব।

শ্রোতাদের কাছে সৎ থাকার আরেকটা ভালো দিক আছে। আমি যা বলছি তা তো তারা জানতে পারছেই, সেই সঙ্গে আমার কেমন অনুভূতি হচ্ছে সেটাও তাদের অজানা থাকছে না। এর ফলে শ্রোতাদের সঙ্গে ভালো একটা সম্পর্ক গড়ে উঠবে আপনার। কিন্তু আপনি যদি শ্রোতাদের সামনে নিজের অনুভূতি লুকিয়ে রাখেন, তাহলে আপনার সেই চাপ বা ভয় কোনো দিন কাটবে না।

সফল হতে জানতে হবে আরও কিছু

নিজের দৃষ্টিভঙ্গি পাণ্টে ফেলুন। বুঝতে পারছেন কথা বলতে কেমন যেন একটা অস্বস্তি কাজ করছে; তারপরও কথা বলার ইচ্ছেটা নিজের মধ্যে জাগিয়ে তুলুন। এবারেই একসময় দারুণ বাক্পটু হয়ে উঠবেন আপনি। মায়ামির ওই রেডিও স্টেশনে প্রথম দিন যে হাস্যকর ঘটনা ঘটেছিল, তারপর থেকে আমি আমার দৃষ্টিভঙ্গি পাণ্টে ফেলি। নিজের কাছে দুটো প্রতিজ্ঞা করি :

১. আমি কথা বলে যাব।
২. দিনদিন আমি আমার কথা বলার ক্ষমতা বাড়াব, প্রয়োজনে কঠিন পরিশ্রম করে হলেও।

কী করেছিলাম আমি? আসলে কী করেছিলাম, সেটা না বলে বলা উচিত কী করিনি। কেননা, নিজের কাছে প্রতিজ্ঞা করার পর প্রায় সবকিছুই করতে শুরু করলাম। ল্যারি কিং শো দিয়েই শুরু হতো আমার কাজ। তারপর আবহাওয়ার খবর পড়তে লাগলাম। সেই সঙ্গে চলতে থাকল খেলার রিপোর্ট পড়া। বাদ দিলাম না ব্যবসায়িক রিপোর্টও। এমনকি কেউ যদি শারীরিক অসুস্থতার জন্য স্টেশনে আসতে না পারত, তার কাজটাও স্বেচ্ছায় নিজের কাঁধে নিয়ে নিতাম আমি।

কথা বলার কোনো সুযোগই হাত ছাড়া করতাম না। এভাবে যত বেশি সম্ভব কথা বলতে শুরু করলাম। সব সময় চেষ্টা করতাম মাইক্রোফোনের সামনে থাকার। কথা বলায় দক্ষ হওয়ার জন্য রীতিমতো যুদ্ধ শুরু করে দিয়েছিলাম। নিজেকে সব সময় মনে করিয়ে দিতাম—টেড উইলিয়াম যা করেছেন, আমিও ঠিক তাই করছি। তুখোড় একজন বেসবল হিটার হওয়া সত্ত্বেও তিনি প্রতিদিন তার ব্যাটিং প্র্যাকটিস চালিয়ে গেছেন। আমিও ঠিক তা-ই করছি।

মজার ব্যাপার হচ্ছে, আপনিও এখন ঘরে বসে কথা বলা প্র্যাকটিস করতে পারেন। এ ব্যাপারে অসংখ্য বই পাবেন বাজারে। তা ছাড়া সম্প্রতি কিছু ভিডিও ছাড়া হয়েছে। কাজেই কথা বলার ব্যাপারে নিজেই নিজের দক্ষতা বাড়াতে পারেন। ঘরের দরজা বন্ধ করে নিজের সঙ্গে জোর গলায় কথা বলায় দোষের কিছু নেই। আমি মাঝেমধ্যে এই প্র্যাকটিস করে থাকি। নিজের ফ্ল্যাটে একাই থাকি আমি। সময় পেলে মাঝেমধ্যে নিজের সঙ্গে জোর গলায় কথা বলি। হয়তো কোনো একটা নির্দিষ্ট দিনে কারো সঙ্গে কথা বলতে হবে আমায়। তার সঙ্গে কী কী কথা বলব, সেটা জোর গলায় বলে নিজেকে একটু ঝালিয়ে নিই। কিংবা দেখা গেল কিছুদিন পরই গুরুত্বপূর্ণ একটা টক শো করতে হবে। এক্ষেত্রে ঘরের ভেতর জোরে জোরে কথা বলি।

এ ব্যাপারে আমার নিজের মধ্যে কোনো অস্বস্তি কাজ করে না। কারণ, একমাত্র আমি ছাড়া আর কেউ থাকে না পুরো ফ্ল্যাটে। আপনি যদি ফ্ল্যাটে একা না হয়ে থাকেন, তাহলেও কিন্তু এই প্র্যাকটিসটা অনায়াসে করতে পারেন। এখানে ইচ্ছেটাই হচ্ছে আসল কথা। হেঁটে চলে যান বারান্দায়। তারপর জোর গলায় কথা বলুন নিজের সঙ্গে। এমনকি গাড়ি চালানোর সময়ও নিজের সঙ্গে কথা বলতে পারেন আপনি।

আরেকভাবে নিজের কথা বলার দক্ষতা বাড়াতে পারেন। সেটা হলো আয়নার সামনে দাঁড়িয়ে কথা বলা। এটা খুব সাধারণ একটা কৌশল। অনেক

মানুষের সামনে কথা বলতে যারা অস্বস্তিবোধ করেন, তাদের জন্য খুব কাজে দেবে এই চর্চা। তা ছাড়া প্রতিদিনের সাধারণ আলোচনাতেও নিজের দক্ষতা বাড়াতে পারবেন এই চর্চা থেকে। বেশ কিছুদিন এই প্র্যাকটিস করলে অন্যের সঙ্গে কথা বলার সময় নিজেই বুঝতে পারবেন, কথা বলার ব্যাপারে আপনার দক্ষতা কতটা বেড়েছে। এই চর্চা আপনাকে শিক্ষা দেবে কথা বলার সময় কীভাবে অন্যের চোখের সঙ্গে যোগাযোগ রক্ষা করতে হয়। কারণ, আয়নার সামনে দাঁড়িয়ে কথা বলার সময় অজান্তেই আপনি নিজের প্রতিবিশ্বের দিকে তাকিয়ে থাকবেন। ফলে প্রতিবার আয়নার সামনে দাঁড়িয়ে কথা বলার সময় অন্যের চোখের দিকে তাকিয়ে কথা বলার দক্ষতা বাড়বে আপনার।

কথা বলায় দক্ষতা বাড়াবার জন্য আরেকটা কৌশলের কথা বলতে পারি। তবে কৌশলটা শোনার পর ভুল করে কোনো ডাক্তারকে আমার বাসায় পাঠালে কিন্তু বিপাকে পড়ে যাব! পোষা কোনো প্রাণী আছে আপনার বাসায়? এই যেমন ধরুন, বিড়াল, পাখি কিংবা গোল্ডফিস—একটা হলেই হলো। তাদের সামনে দাঁড়িয়ে গুরু করে দিন কথা বলা। এই কৌশল আপনাকে সত্যি সত্যি অনেক দক্ষ করে তুলবে। তবে সাবধান! কে কী মনে করবে কিংবা আপনাকে কেউ দেখছে কি না, সেটা ভুলেও ভাববেন না। মনে রাখবেন, আপনি শুধু কথা বলার ব্যাপারে নিজের দক্ষতা বাড়াবার চেষ্টা করছেন।

তবে শুধু চর্চা করে গেলেই হবে না, সঙ্গে আরও দুটো জিনিস থাকতে হবে আপনার। এক হচ্ছে, অন্যের প্রতি কৌতূহল। দুই হচ্ছে, কথা বলার সময় অন্যের সামনে নিজেকে পুরোপুরি মেলে ধরা। আপনারা হয়তো অনেকেই জানেন যে, সিএনএন-এ রাতের বেলা আমি একটা টক শো করি। দর্শকরা অনেকেই বুঝতে পারেন যে, যার সঙ্গে আমি কথা বলছি, তার ব্যাপারে আমার অনেক কৌতূহল আছে। আমি সব সময় চেষ্টা করি তাদের চোখের দিকে তাকিয়ে কথা বলতে। তবে অনেক মানুষ আছেন, যারা অন্যের চোখের দিকে তাকিয়ে কথা বলতে পারেন না। এই ব্যাপারেও পরে আলোচনা

করব। প্রথমে আমি অন্যের চোখের দিকে তাকাই। তারপর চেয়ারে বসার পর সামনের দিকে ঝুঁকে পড়ি। এরপর শুরু হয় আমার প্রশ্ন।

শো-তে যার সঙ্গেই কথা বলি না কেন—সবাইকে শ্রদ্ধা করি। আপনাকেও এই কাজটা করতে হবে। কারণ যার সঙ্গে কথা বলবেন, তিনি যদি বুঝতে পারেন তাকে আপনি এড়িয়ে যাচ্ছেন, তাকে যথেষ্ট গুরুত্ব দিচ্ছেন না কিংবা তার বলা কথায় যদি আপনার মনোযোগ না থাকে; তাহলে তিনি যেমন আপনার সঙ্গে কথা বলার উৎসাহ হারিয়ে ফেলবেন, তেমন আপনিও তার সঙ্গে মন খুলে কথা বলতে পারবেন না। উইল রজারস একবার বলেছিলেন— ‘বিষয়ের বিভিন্নতা বিচারে সবাই আসলে অজ্ঞ।’ কথা বলার সময় উইলের এই কথাটা মনে রাখবেন। এই কথার আসল তাৎপর্য হচ্ছে প্রত্যেকটা মানুষ একটা না একটা বিষয়ে দক্ষ। সবার মধ্যে এমন একটা বিষয় আছে, যেটা নিয়ে সে কথা বলতে ভালোবাসে।

ধরুন কারো সঙ্গে আপনি কথা বলছেন। বক্তা নির্দিষ্ট একটা বিষয় নিয়ে অনেক কথা বলছেন। আপনি বুঝতে পারছেন যে সে এই বিষয়ে খুব দক্ষ। তাকে অবশ্যই আপনার শ্রদ্ধা করতে হবে। তিনি যখন বুঝতে পারবেন আপনি তাকে শ্রদ্ধা করছেন, তার কথা মনোযোগ দিয়ে শুনছেন, তখন তিনিও আপনার কথা মনোযোগ দিয়ে শুনবেন। আপনি যদি তার কথায় মনোযোগ হারিয়ে ফেলেন, তাহলে তিনিও কিন্তু আপনার কথায় মনোযোগ হারিয়ে ফেলবেন।

কথা বলার সময় আরেকটা ব্যাপার মনে রাখতে হবে। নিজের ভেতর যা হচ্ছে, সেটা অস্বস্তি বা আর যাই হোক, পরিষ্কার করে বলতে হবে আপনার সামনে বসা ভদ্রলোকটিকে। এতে আপনার ভেতরের চাপ ধুয়েমুছে সাফ হয়ে যাবে। প্রথম দিন রেডিওতে কথা বলার সময় আমার কি অভিজ্ঞতা হয়েছিল সেটা ইতোমধ্যে আপনারা জেনেছেন। কাজেই আপনার নিজের মধ্যে যাই ঘটুক—সেটা বুঝিয়ে বলুন। আমার কথার আবার ভুল অর্থ করে বসবেন না।

আমি আপনাদেরকে বুঝিয়ে কথা বলতে বলেছি। কিন্তু তাই বলে সারাক্ষণ নিজের ব্যাপারে কথা বলতে যাবেন না। সেই সঙ্গে নিজের গোপন ব্যাপারগুলোও গোপনই রাখবেন।

আরেকটা কথা জানিয়ে রাখি। ধরুন, কোনো একটা বিষয়ে আপনার কাছ থেকে কিছু তথ্য জানতে চাওয়া হচ্ছে। আপনি মন খুলে সেটা জানাবেন। কারো সঙ্গে নতুন পরিচয় হবার পর কিছুদিনের মধ্যেই তার স্বভাব-চরিত্র সম্পর্কে একটা ধারণা পাবেন। যদি বুঝতে পারেন আপনার ভালো লাগা, খারাপ লাগা, পরিবার ইত্যাদি ব্যাপারে গল্প করলে তিনি মনোযোগ দিয়ে শুনবেন; তাহলে তাকে সবকিছু জানাবেন। এভাবেই আমরা মানুষ সম্পর্কে জানতে পারি।

কথা বলার ব্যাপারে রিগিস ফিলবিন আর কেথি লি জিফোর্ডকে দৃষ্টান্ত মানতে পারেন। তাদের মতো খোলা মন নিয়ে আর কেউ বোধহয় কথা বলতে পারেন না। খুব স্বাভাবিক ভঙ্গিতে আপনার ঘরে ঢুকে পড়বেন তারা। তারপর বলতে শুরু করবেন। যা মনে আসবে তাই বলবেন, কোনো রাখঢাক করবেন না। নিজেদের যেকোনো গল্প অবলীলায় বলে যাবেন। তবে তাই বলে নিজেদেরকে আলোচনার মূল কেন্দ্রবিন্দুতেও নিয়ে আসবেন না। গল্প শোনার সময় তাদের শ্রোতা যদি দুঃখজনক কোনো শব্দ উচ্চারণ করেন বা আবেগ-আপ্লুত হয়ে পড়েন, তাহলে তারা তো থামেনই না; বরং নিজেদের অনুভূতির ভাগ করে নেন শ্রোতার সঙ্গে।

রিগিস ফিলবিন আর কেথি লি জিফোর্ড জানেন, আবেগ, ভয়, দুঃখ—সবকিছুরই দরকার আছে। গল্প বলার সময় শ্রোতার প্রতিক্রিয়া যাই হোক না কেন, সেটা থামাবার কোনো প্রয়োজন নেই। কারণ, গল্পে বলে আসলে শ্রোতাকে নিজেদের জায়গায় বসাচ্ছেন তারা। স্টুডিও আর বাড়ির দর্শকরা তাদের এই গল্প মনোযোগ দিয়ে শুনছেন। তারা বুঝতে পারছেন, এই দুজন

নিজেদের মধ্যে কোনো কথা লুকিয়ে রাখছেন না—একেবারে খোলা মনে কথা বলে যাচ্ছেন।

আজ পর্যন্ত আমি যাদের সঙ্গে কথা বলেছি, তারা সবাই আমার ব্যাপারে দুটো জিনিস জেনেছে : এক. আমি ব্রুকলিনের লোক আর দুই. আমি একজন ইহুদি। যার সঙ্গেই কথা বলি না কেন, নিজের সম্পর্কে জানাতে ভালোবাসি আমি। তা ছাড়া ইহুদি আর ব্রুকলিন—এই দুটো নিয়ে আমি খুব গর্বিত। শুনে আপনারা আশ্চর্য হবেন, বেশির ভাগ আলোচনা শুরু হয় আমার খুঁটিনাটি বিষয় নিয়ে।

আমি যদি তোতলা হতাম, আমার কথার গাড়ি কিন্তু এক মুহূর্তের জন্যেও থামত না। তখন আমি কথা বলতাম ঠিক এভাবে : ‘আ...আ...আপনার সঙ্গে দে...দে...দেখা হওয়ায় খুব খুশি হয়েছি। আ...আ...আমার নাম ল্যারি কিং। আমার সমস্যা হচ্ছে—আমি একটু তো...তো...তোতলাই। কিন্তু তারপরও আ...আ...আপনার সঙ্গে কথা বলতে ভা...ভা...ভালো লাগবে আমার।’

এই কথা বলার সঙ্গে সঙ্গে আপনার ভেতরে থাকা সব চাপ দূর হয়ে যাবে। শ্রোতারা আপনার অবস্থা সম্পর্কে পরিস্কার একটা ধারণা পেয়ে যাবেন। নিজের দুর্বলতার কথা অকপটে বলে ফেলায় শ্রোতা ভাববে—এই চাপ থেকে মুক্ত হয়ে গেছেন আপনি। কাজেই নিজের দুর্বলতার কথা প্রকাশ করতে কখনো ভয় পাবেন না। কারণ, আপনি শুধু নিজের অবস্থার কথা বর্ণনা করছেন। যখন চাপমুক্ত হয়ে যাবেন, তখন পুরো আলোচনা হয়ে যাবে মুক্ত। তখন তোতলান আর যাই করুন না কেন—আপনার নিজের মধ্যে আর কোনো অস্বস্তি থাকবে না। এতে আপনার তোতলামি ঠিক হবে না, তবে অনায়াসে ভালো একজন বক্তা হতে পারবেন।

মিল নামে এক ভদ্রলোককে আমি চিনি। তারও তোতলামির অভ্যাস ছিল। কিন্তু ব্যাপারটা তিনি পান্ডাই দিতেন না। যখনই বুঝতে পারতেন ব্যাপারটা তাকে অস্বস্তির মধ্যে ফেলে দিচ্ছে, তখনই এ ব্যাপারে কথা বলতে শুরু করতেন। তোতলামি নিয়ে একের পর এক কৌতুক বলে যেতেন।

ফ্লোরিডায় টিভিতে কাজ করার সময় একবার অদ্ভুত এক অতিথি আসেন আমার শো-তে। ভদ্রলোক এমন ভঙ্গিতে কথা বলেন যে, সেটা বোঝা বেশ কঠিন হয়ে যায়। নিজের এই সমস্যার কথা তিনি জানেন। কিন্তু তারপরও নির্দিধায় আমার শো-তে এসেছেন এবং নিঃসংকোচে কথা বলেছেন নিজের ব্যাপারে। অবাক করার মতো ব্যাপার হচ্ছে, তিনি একজন মাল্টিমিলিয়নিয়ার। সাধারণ একজন বিক্রয়কর্মী থেকে তার এই উত্থান। আজ পর্যন্ত যতজনের সঙ্গে পরিচিত হয়েছেন, তাদের কারো কাছেই নিজের দুর্বলতা লুকাবার চেষ্টা করেননি তিনি। অকপটে স্বীকার করেছেন নিজের দুর্বলতার কথা। তার সফলতার অন্যতম কারণ হচ্ছে, নিজের দুর্বলতাকে তিনি মানিয়ে নিতে পেরেছেন।